



اسم المائة: سورة العلق

من سلسلة: تفسير جزء عم

لفضيلة الشيخ: و. أحمد عبد المنعم



Way2allah.com



إنتاج فريق التفريغ بشبكة الطريق إلى الله



اسم المادة: سورة العلق

من سلسلة: تفسير جزء عم

لفضيلة الشيخ: د. أحمد عبد المنعم

السلام عليكم ورحمة الله وبركاته

إن الحمد لله نحمده ونستعينه ونستغفره، ونعوذ بالله من شرور أنفسنا وسيئات أعمالنا، من يهده الله فلا مضل له ومن يضلل فلا هادي له، وأشهد أن لا إله إلا الله وحده لا شريك له وأشهد أن محمداً عبده ورسوله -صلى الله عليه وسلم-.

بإذن الله -عز وجل- نبدأ اليوم أول جلسة من جلسات التفسير أو "جلسات قرآنية"، احنا مش عايزين نسميها مجلس تفسير، ونرجو أن يصدق علينا قول النبي -صلى الله عليه وسلم-: "ما اجتمع قومٌ في بيتٍ من بيوتِ الله يتلون كتابَ الله ويتدارسونه بينهم إلا نزلت عليهم السكينة وغشيتهم الرحمة وحفَّتْهم الملائكةُ وذكرهم الله فيمن عنده"^١، أسأل الله -عز وجل- أن يكون المجلس ده مجلس بتحفة الآن الملائكة، والآن بتنزل علينا السكينة والرحمة، وإن ربنا -سبحانه وتعالى- يذكرنا الآن.

سريعاً قبل أن أبدأ هذه المجالس -مجالس القرآن-؛ إن مجموعة من الناس يقعدوا في بيت من بيوت الله -عز وجل- في مسجد ويقرأوا سورة معينة، ويجيبوا أي تفسير مبسط: أيسر التفاسير للشيخ أبو بكر الجزائري، أو تفسير الشيخ السعدي، أو مختصر لتفسير الإمام ابن كثير، أو أي تفسير مبسط.

إن هما يجتمعوا في مسجد ويقرأوا السورة ويتدارسوها مع بعض، وواحد يقول: أنا قرأت في الآية دي معنى فلاي، أو أنا قرأت في هذه الآية هذا المعنى، الطريقة اللي ممكن احنا شايفينها بسيطة جداً دي، هذه الطريقة زكّاها النبي -صلى الله عليه وسلم- ويذكرها الله -عز وجل-، يعني الأحداث التي تحصل، الطاعات التي تحصل كثير، نصّ النبي -صلى الله عليه وسلم- على أشياء معينة يذكرها الله -عز وجل- فيمن عنده، فمنها: المجالس القرآنية التي بتقام في المساجد؛ هذه المجالس هي حقيقةً فعلاً هي الوقود الحقيقي، وهي الزاد الحقيقي للقلب المنطلق إلى الله -عز وجل-، لأن لازم يكون الغذاء هو القرآن، غذاء القلب هو القرآن.

فلما يبقى الإنسان يقعد في بيت من بيوت الله، وبتحفة الملائكة وتنزل عليه السكينة والرحمة ويذكرهم الله -عز وجل- فيمن عنده، يبارك في هذا المجلس لبركة القرآن؛ لأنه كلام الله -عز وجل-، فالمجالس دي بتبقى مجالس مُباركة؛ مش عشان المتكلم فيها شخص معين، أو المسجد مسجد معين، أو المستمعين اللي بيستمعوا للمجلس، أو حتى هما لو مفيش مستمع ده هما كلهم بيتكلموا مع بعض ويستمعوا لبعض كلهم، **"وتواصوا"** العصر: ٣، صيغة التواصي إن كله بيوصي بعضه، هذه المجالس مباركة لبركة القرآن.

فهذه المجالس نرجو إن ربنا -سبحانه وتعالى- يكتب لها القبول وإن هي تنتشر في الأرض، وإن نرجع تاني كان زمان الصحابة لما يجلسوا مجلس مع بعض وسيدنا عمر بن الخطاب يقول لأي موسى الأشعري: "ذَكِّرْنَا رَبَّنَا"^٢ فيقرأ أبو موسى الأشعري القرآن.

^١ صحيح مسلم^٢ صحيح ابن حبان

وكان سيدنا عمر بن الخطاب يجمع أهل المشورة، ويجمع كبار أهل بدر، ويجمع كبار الصحابة عشان يتناقشوا في الآيات، يسأل في مرة عن: **"إِذَا جَاءَ نَصْرُ اللَّهِ وَالْفَتْحُ"** النصر: ١، ويسأل في مرة عن آيات من سورة البقرة، ويسأل في مرة في آيات أخر، وتعدد الأجوبة ويوصلوا لرأي في هذه الآيات، كانوا يتدارسوا القرآن.

فيأذن الله -عز وجل- نبدأ مجلس مع بعض في سورة العلق، ويكون الأولى والأفضل إن احنا كل مرة مثلاً نحدد السورة اللي هنتكلم فيها بحيث إن أنت طوال الفترة دي بتقرأ في تفسيرها، بتصلي بيها، بتراجع حفظها، بترجع تاني تقيم علاقة مع هذه السورة مرة أخرى؛ لأن أنت لما بتترك سورة من سور القرآن فترة طويلة بتنحف العلاقة بينك وبين السورة، العلاقة اللي بينك وبين السورة بتنحف، في آخر مرة مثلاً صليت بسورة فاطر امتي؟ وآخر مرة قرأت تفسير سورة سبأ امتي؟ وآخر مرة فتحت المصحف وقعدت تبص على معاني سورة الأحزاب امتي؟ فالواحد من كتر بعده عن القرآن بيحف، فالإنسان بيعجب ازاي الإنسان قلبه هيعيش وهو بعيد عن القرآن!

لأنها البداية:

فنبداً بإذن الله -عز وجل- سريعاً كدا وقفات مع سورة العلق، والكلام في سورة العلق كلام الواحد لما بدأ يبص الناس اللي كتبت في سورة العلق أو عملت شرايط عن سورة العلق وجد اهتمام بالغ من العلماء والمفسرين بهذه السورة، اهتمام بالغ من العلماء والمفسرين والدعاة بسورة العلق، ليه؟ لأنها البداية، ولا بد أن يكون الإنسان لا بد أن تكون بدايته صحيحة، لازم تكون بدايتك صح عشان تعرف تنطلق صح، فلو تخيل إنسان من البداية وماشي غلط فمستحيل هيصل، إنما الإنسان لما يبدأ صح والطريق من الأول مسدد وموجه يصل بإذن الله -عز وجل-، إنما من الأول ماشي في طريق غلط لن يصل، فسورة العلق أهميتها لأنها البداية، ومهما فكر الإنسان ازاي تكون البداية بعقله لن يصل.

فالقرآن بيعلمك ما لم تعلم، ويبصرك ما لم ترى، فلما بتبدأ تنظر إلى العالم، وإلى نفسك، وإلى صفات الربوبية من خلال سورة العلق بتشوف الناس صح، وتعرف نفسك صح، وتبتدأ تفهم يعني ايه ربوبية؟ ويعني ايه الرب؟ وياه أول علاقة بين الإنسان وبين الرب؟ بين الخالق -سبحانه وتعالى- وبين المخلوق؟ فتبدأ السورة تخليك تشوف صح.

نبدأ مع بعض سورة العلق سريعاً كدا: بسم الله الرحمن الرحيم

"اقْرَأْ بِاسْمِ رَبِّكَ الَّذِي خَلَقَ * خَلَقَ الْإِنْسَانَ مِنْ عَلَقٍ * اقْرَأْ وَرَبُّكَ الْأَكْرَمُ * الَّذِي عَلَّمَ بِالْقَلَمِ * عَلَّمَ الْإِنْسَانَ مَا لَمْ يَعْلَمْ * كَلَّا إِنَّ الْإِنْسَانَ لِكَبِيرٌ لِّيَطْفَى" العلق ١: ٦.

هذه الآيات لغاية قبل **"كَلَّا إِنَّ الْإِنْسَانَ لِكَبِيرٌ لِّيَطْفَى"** نزل بها جبريل لأول مرة على النبي -صلى الله عليه وسلم- فقال له: اقرأ، قال: "ما أنا بقارئ"، فضمه حتى بلغ منه -صلى الله عليه وسلم- الجهد، ثم أرسله فقال: اقرأ، قال: "ما أنا بقارئ"، فكرر ذلك ثلاثاً حتى قال له: **"اقْرَأْ بِاسْمِ رَبِّكَ الَّذِي خَلَقَ"**.

الانطلاق والوصول إلى الله:

نقف سريعاً وقفات مع أول آية دي، أول شيء أن أول كلمة بدأت **"اقرأ"**؛

^٣ صحيح البخاري

قيل: **اقرأ القرآن**؛ وكأن البداية في علاقتك بالله - عز وجل - هي في قراءة القرآن، لأنك أنت تتوصل لرنا ازاى؟ ما هو أنت نفسك ترضي الله - عز وجل -، ونفسك تفهم تعمل ايه، وايه هي الحقائق الكونية العظيمة الموجودة، كل ده موجود في القرآن، فتخيل الإنسان من غير القرآن **فعلاً إنسان أعمى**، فلو إنسان بدأ بدون اتصال بالقرآن هيبقى إنسان تائه، ينظر ويُقدّر الأشياء على غير قيمتها، يُعَرّ في الأشياء، يبدأ يُعَرّ في الأشياء، مش عارف قيمة الأشياء.

فأول شيء، أول وقفة معنا في السورة: قضية القرآن، وأنه لا وصول لك بدون القرآن، مش وصولك هيتأخر؛ لا وصول لك إلى الله - عز وجل - بدون القرآن، الفوائد كتير فاحنا بنجمّع الفوائد سريعاً مع بعض.

ثانياً: إن السورة بدأت بأمر **"اقرأ"** مبدأتش "سنقرئك" مثلاً، فلان الإنسان يفهم إن عشان ينطلق إلى الله - عز وجل -، تجد إن السورة مفادها: **"اقرأ"**، و**"لا تُطغهُ وَاسْجُدْ"**، مفاد السورة أنك تطلع بها كأوامر تنفذها، فيه أوامر وفيه منبهات، فالإنسان اللي مش هيبداً ينفذ اللي بيتقاله من الأول مش هيوصل، يعني **"اقرأ"** دي سلم، **"فَمُ فَانْذِرْ"** سلم، **"فَمُ اللَّيْلُ"** سلم، معراج بيصعد بيبك، لو مش هتطبق الأشياء دي مهما بقى قعدت تفكر أو تتمنى لا وصول لك.

يعني لما رنا قال لسيدنا موسى: **"أَنَا اخْزْتُكَ"** طه: ١٣، قال: **"فَخُذْ مَا آتَيْتُكَ وَكُنْ مِنَ الشَّاكِرِينَ"** الأعراف: ١٤٤، لما رنا قال لمريم: **"إِنَّ اللَّهَ اصْطَفَاكِ وَطَهَّرَكِ وَاصْطَفَاكِ عَلَى نِسَاءِ الْعَالَمِينَ"** آل عمران: ٤٢، قال: **"يَا مَرْيَمُ اقْنُتِي لِرَبِّكِ وَاسْجُدِي وَارْكَعِي مَعَ الرَّاكِعِينَ"** آل عمران: ٤٣، يبقى كل تشريف معاه أمر، لما يجي تشريف معين ده مش معناه أنك وصلت خلاص لا ده معناه زيادة الأوامر اللي عليك. فالبداية بدأت بـ **"اقرأ"** إنك لازم تتقرب بالشبر، قال الله - عز وجل - في الحديث القدسي: **"وَمَنْ تَقَرَّبَ إِلَيَّ شَبْرًا، تَقَرَّبْتُ إِلَيْهِ ذِرَاعًا"**؛ يبقى أنت اللي بتاخذ الشبر الأول.

دائماً مشكلتنا في الشبر الأول؛ لأن رنا يقول: **"من تَقَرَّبَ إِلَيَّ شَبْرًا، تَقَرَّبْتُ إِلَيْهِ ذِرَاعًا"** فأنت عندك ذراع سهل، ذراع من الطريق إلى الله - عز وجل - مستنير، فيه سهولة؛ لأن فيه معية رنا، فتمشي في الذراع ده بسهولة فتتقرب الذراع يتقرب الله إليك باعاً، تمشي في الباع، تبدأ تمشي يأتيك الله هرولة، تبدأ تجري أنت في الطريق، فكل الطريق سهل ما عدا أول شبر لابد فيه من بذل ومشقة **"فَلَا افْتَحَمَ الْعَقَبَةَ"** البلد: ١١، لازم فيه عقبة في الأول بتقترحمها، بترمي نفسك فيها.

فالشبر بدأ بـ **"اقرأ"**، وبعدين: **"فَمُ فَانْذِرْ"**، وبعدين: **"فَمُ اللَّيْلُ"**، فهذه الأوامر لابد إن الإنسان يطبقها، الأوامر دي مش جاية عشان مجرد إن هي تتلى، لأ تتلى وتطبق.

فتخيل أول آية في القرآن: أمر، اعمل كذا، كثير من الناس مش عايز يسمع كلمة اعمل وماتعملش، يعني هو عايز حتى لو هيسمع مش عايز يطالع بأعمال، هو عايز يطالع بكلام، لأ، فأول شيء في القرآن أمر.

ثاني شيء: إن أول شيء في القرآن أمر لا يستطيعه النبي - صلى الله عليه وسلم -؛ قال: **"ما أنا بقارئ"** فلما يُطلب منك أشياء أنت معملتهاش قبل كذا متقولش مش هينفع، فكان الحل ايه؟ **"اقرأ بِاسْمِ رَبِّكَ"** أنك تستعين بالله حتى لو متعرفش.

لما يقولك اشتغل في الدعوة، يبقى تستعين بالله وتبدأ تبذل الأسباب؛ لأن عندنا بعد كذا **"عَلَّمَ بِالْقَلَمِ"** القلم ده سبب، يبقى لابد للإنسان حتى لو طُلب منه أشياء مبيعملهاش قبل كذا، مانقلوش صل قيام الليل، يقولك أصل أنا مصلتش قبل كذا، اقرأ قرآن، أصل صعب، اطلب

العلم، أصل معرفش، ادع إلى الله، أصل معرفش، لأ، فأول أمر نزل أو أول كلمة نزلت على النبي -صلى الله عليه وسلم- أمر لا يستطيعه النبي -صلى الله عليه وسلم-.

احنا قولنا البداية كانت بـ "اقْرَأْ"، كان المتوقع إن البداية تبقى بـ "قُمْ اللَّيْلُ"، أو "قُمْ فَأَنْذِرْ"، لأ "اقْرَأْ" قبل "قُمْ اللَّيْلُ" و "قُمْ فَأَنْذِرْ" ليه؟ ليه البداية بـ "اقْرَأْ" قبل "قُمْ اللَّيْلُ" و "قُمْ فَأَنْذِرْ"؟ البداية بالتلات أوامر دول؛ هما دول أركان الإنسان المسلم الصالح المصلح، تلات أركان:

١- يقرأ، يتعلم كتاب الله -عز وجل- وسنة النبي -صلى الله عليه وسلم-.

٢- يدعو إلى الله.

٣- يقوم الليل.

ليه البداية بـ "اقْرَأْ" قبل "قُمْ اللَّيْلُ" و "قُمْ فَأَنْذِرْ"؟ احنا أشرنا إنه عشان يمشي صح، لأن أنت هتدعو إلى الله -عز وجل- من غير قرآن هتضل، هتضيع، أنت حتى لو قمت الليل وقلبك انشغل عن معاني القرآن، بعض الناس -للأسف- قيام الليل يطغيه، وزى ما ابن القيم اتكلم عن إن أحياناً الإنسان وكثير من السلف لما كان يقول: "أَنْ يَبِيْتَ نَائِمًا وَيَصْحُو نَادِمًا أَحَبُّ إِلَيْهِ مِنْ أَنْ يَبِيْتَ قَائِمًا وَيَصْحُو مُعْجَبًا" يعني: يصحى الصباح يستيقظ معجباً أو يُصبح معجب بقيامه ده أسوأ من إن هو لو كان راحت عليه نومة وقام ندمان على تقصيره بين يدي الله -عز وجل- كان أفضل له إن هو يصحى ندمان، فالشاهد أن البداية بـ "اقْرَأْ" هو اللي بتديك النور في كل حياتك بعد كدا؛ اللي هو قراءة القرآن، وزى ما بَوَّب الإمام البخاري: العلم قبل القول والعمل، "فَاعْلَمْ أَنَّهُ لَا إِلَهَ إِلَّا اللَّهُ وَاسْتَغْفِرْ لِذَنْبِكَ" محمد: ١٩، يبقى لابد إن الإنسان لما يقرأ يتعلم من خلال القرآن، يبقى أول شيء احنا قلنا: البداية بالأمر.

تاني شيء: طب أنا مقدرش؛ "بِاسْمِ رَبِّكَ" تستعين بالله -عز وجل-، وتذكر اسم الله -عز وجل- على كل شيء، على الصعب وعلى السهل، النبي -صلى الله عليه وسلم- كان يقول: "اللَّهُمَّ لَا سَهْلَ -مفيش حاجة سهلة- إِلَّا مَا جَعَلْتَهُ سَهْلًا" يعني حتى حفظ الآيات الصغيرة دي مش سهل إلا أن يُسهله الله -عز وجل-.

ففضية اقرأ أو أي أمر من أوامر الدين بيبدأ القرآن يعلمك في أول آية في القرآن إن أي شيء لابد أن تستعين فيه بالله -عز وجل-، وأن تذكر اسم الله -عز وجل- عليه، وأن تستحضر دائماً معية الله -عز وجل- لك أثناء السير في الطريق إلى الله -عز وجل-، لازم وإلا زي ما قولنا هتنسب الأشياء إلى قدرتك، وإذا لم يكن عونٌ من الله للفتى ** كان أول ما يجني عليه اجتهدُهُ. لو ربنا ماعنشنا الإنسان أول حاجة تضيع الإنسان: عقله ودماعه واجتهاداته لو سار بعيداً عن الله -عز وجل-.

اعرف نفسك واعرف ربك:

"اقْرَأْ بِاسْمِ رَبِّكَ الَّذِي خَلَقَ": هنا بدأ الكلام عن الربوبية، وعن صفة الخلق لله -عز وجل- من صفات الربوبية، ليه مقالش "اقرأ باسم الرحمن الرحيم"؟ ليه من الأول في هذا الطريق الطويل اللي بدايته كانت "اقْرَأْ" والنبي -صلى الله عليه وسلم- بيحاول أن يسجد عند الكعبة وأبو جهل بيقله: "لَنْ رَأَيْتُهُ يَفْعَلُ ذَلِكَ -محَمَّدًا يُعْفِرُ وَجْهَهُ بَيْنَ أَظْهُرِهِمْ- لِأَطَّانَ عَلَى رَقَبَتِهِ"، هذا البداية إلى الطريق الطويل الذي انتهى بـ "إِذَا جَاءَ نَصْرُ اللَّهِ وَالْفَتْحُ * وَرَأَيْتَ النَّاسَ يَدْخُلُونَ فِي دِينِ اللَّهِ أَفْوَاجًا" النصر: ١، الطريق الطويل ده بدأ "بِاسْمِ رَبِّكَ"، ليه الربوبية وليه الخلق؟ لو جينا نشوف كدا أول ٥ آيات أو أول ٦ آيات: هنلاقي فيها إن كلمة "رَبِّكَ" جت مرتين، وكلمة "الْإِنْسَانُ" جت مرتين في أول ٥ آيات وأول ٦ آيات يبقى جت ٣ مرات، و(الخلق) جت مرتين، خلاص، كأن البداية: اعرف نفسك واعرف ربك، والبداية دي اللي بيبدأ من

^٥ الصحيح المسند

^٦ صحيح مسلم.

غيرها زي ما قولنا بيضل، اللي مش بيبقى عارف قيمة نفسه أد ايه هو فقير، أد ايه هو ضعيف، أد ايه هو محتاج، اللي مبيبدأش البداية دي ومبيعرفش أد ايه ربنا قدير، أد ايه ربنا -سبحانه وتعالى- يخلق من العدم، أد ايه ربنا -سبحانه وتعالى- له فضل على الإنسان وهو الذي رباه بنعمه؛ هي دي البداية.

كأن بداية القرآن: "اعرف ربك واعرف نفسك"، لازم تعرف الحقيقة دي، اعرف إن الناس كلهم علق، اعرف إن ربنا جابهم كلهم من عدم، اعرف إن ليك رب بيريك بالنعم، يعني أنت بتزود في كل حاجة؛ في جسمك وفي مشاعرك وفي أفكارك وفي فهمك وفي قوتك وفي أموالك، أي شيء، النمو اللي بيحصل ومش أنت بس، الكون كله "وَالسَّمَاءَ بَنَيْنَاهَا بِأَيْدٍ وَإِنَّا لَمُوسِعُونَ" الذاريات: ٤٧، كل الكون بيربو برعاية الله له، إن ربنا -سبحانه وتعالى- ربه، عشان كذا بتقول "الْحَمْدُ لِلَّهِ رَبِّ الْعَالَمِينَ" الفاتحة: ٢.

ربنا خلق الكون ده بصفات معينة، من هذه الصفات إن للكون سنة بيكبر تدريجيًا، يعني الإنسان لما بيتولد بيقتد ٩ شهور بيبدأ الأول مني مع البويضة، بعد كذا العلقه تتمسك، تمسك العلقه في جدار الرحم وتبدأ تكبر، مضغة تتخلق، والعظام يكسوه اللحم، وبعدين ينزل أنت مستني ٩ شهور مش هينزلك واحد في ستة ابتدائي مثلاً، مش هينزل يجري، لأ ده لسه، أنت مستني ٩ شهور بقي معتقد بقي إن خلاص، وهو ده على فكرة الإنسان الملتزم يعني ممكن يفكر إن هو ايه قاعد يبجاهد بقاله ٩ شهور إنه خلاص بقي، إن هو بقي ينطلق، لأ؛ الإنسان فطر إن هو بيربو إلا أن يشاء ربي شيئاً.

فتخيل إنسان بينزل ولسه يحتاج يرضع، ولسه بيبكي ولا يتكلم، ومبيعرفش يمشي، ويبدأ يزحف، النبتة تبقى بذرة وتبدأ تطلع الجذور والساق والأوراق وتكبر، فالكون كله بيربو، ليه ربنا خلق الكون كذا فيه صفة التدرج دي؟ إن الشمس مش تيجي مرة واحدة وتقف مرة واحدة، يعني تخيل كذا احنا قاعدين فجأة الشمس طلعت، وبعدين مثلاً الساعة خمسة، خمسة وعشرة، خمسة وتلت فجأة الشمس غابت، مبيحصلش كذا، يبقى فيه نوع من التدرج.

التدرج ده ليه؟ من حكمة التدرج في الكون كله في النمو ده، أنه يظل يحتاج إلى الله -عز وجل- في كل لحظة من لحظات حياته، طول ما أنت بتكبر أنت محتاج لربنا، طول ما قلبك بيدق، طول ما الكلية شغالة، طول ما الرئة شغالة، طول ما الخلايا بتاعت جسمك بتنمو، طول ما البذرة بتكبر وتبقى نبتة وبعدين شجرة، طول ما السماء بتتدد، كل ده يحتاج إلى الله -عز وجل- في كل لحظة من لحظاته، فالكون كله لا يستغني عن ربه لحظة واحدة.

عشان الإنسان بمجرد ما يشعر -يظن جاهلاً خاطئاً مخطئاً- يظن أنه استغنى في مرحلة من المراحل، لو ظن ولو للحظات بالاستغناء هيطغى، يعني الإنسان وهو في بطن أمه يحتاج إلى ربه، وهو رضيع يحتاج لربه، فدي ممكن تبقى واضحة آه لأن هو محدش هيوصله وهو علقه ومحتاج لربنا ولسه رضيع، طب لما يبقى شاب وبلغ أشده وبلغ ٣٠ سنة وراجل معاه شهادات ومعاه أموال أيضاً يحتاج إلى ربه، هو طوال رحلة حياته والكون كله هو أشبه بالعلقه يتعلق بالله -عز وجل-، الكون كله طوال زمنه يحتاج إلى ربه -سبحانه وتعالى-، ماتسقطش ورقة إلا بإذنه -سبحانه وتعالى-، كل شيء يحتاج إلى ربه -سبحانه وتعالى-.

فالبداية برب العالمين "اقْرَأْ بِاسْمِ رَبِّكَ"، ومن صفات الربوبية الكثير صفة الخالق، ليه صفة الخلق؟ ليه الكلام دائماً في البداية على الخلق؟ أصل طبيعي الإنسان العاقل لما يروح في أي حنة يسأل: أنا ايه اللي جابني هنا؟ ده سؤال منطقي، لما يبص كذا، طبيعي إن الإنسان لما يبدأ ينظر يقف بس ٣ دقائق يبص على ذراعه وعلى قلبه وايداه ورجله والشمس يبدأ يسأل، أول سؤال منطقي يقول: مين؟ مين أداني دا؟ مين أداني ايدين؟ مين أداني رجلين؟ مين جابني هنا؟ مين خلقي؟ ده طبيعي، أنت بتدخل بيتك وتلاقي حاجات جديدة أول سؤال بتسأله قبل ما تسأل ايه الحاجة؟ مين اللي جابها؟ تخيل أنت مروح دلوقتي البيت لقيت البيت مليون أكل وشرب وهدم وكل اللي أنت عايزه، كل ما تتمناه

وجدته في بيتك، مش منطقي جداً أنك تدخل تقوم مغير ولا بس الهدوم الجديدة وواكل وداخل نايم عادي، ده مش منطقي أبداً، يعني ده - أعزكم الله- دي أخلاق الأنعام، تدخل تلاقي أكل تاكل مفيش مشكلة، مبتعدهش تفكر ايه دا؟ ايه اللي جاب الأكل ده هنا؟ إنما ربنا بيقول: **"فَلْيَنْظُرِ الْإِنْسَانُ -البني آدم ينظر الأول إلى ايه- إِلَى طَعَامِهِ"** عبس: ٢٤، ده طبيعي، مش بيتحط له أكل يقوم داخل واكل وماشي وخلاص، جه لقي ايدين ورجلين قام شغال وخلاص، لأ، الطبيعي أنه يقف يسأل.

فالفطرة الطبيعية لما تضغط عليها بصفة الخلق تستجيب، ده طبيعي، عشان كذا الكفار كانت البداية معاهم بالضغط عليهم **"وَلَكِنْ سَأَلْتَهُمْ مَنْ خَلَقَ"** الزمر ٣٨، كانوا يقولوا ربنا، فتبدأ تقولهم بقى هو (بما أن ... إذا)، هو اللي خلق إذا له الأمر **"أَلَا لَهُ الْخَلْقُ وَالْأَمْرُ"** الأعراف: ٥٤، لما تفسد فطر الناس تيجي تقوله مين اللي خلق؟ يقولك معرفش. ده ضايع! ده ده محتاج بقى ايه من قبل الأول، إنما الكفار المشركين أعتى الناس وبالطبع اليهود والنصارى ودول كانوا أعداء الإسلام؛ تسأله مين خلق؟ يقول: ربنا، تبدأ تكمل، فبدأ الغرب دلوقتي عايز يمسح من الناس ذكر الخلق، طغيان الأسباب اللي وصل له الناس اعتقد أنه ممكن يعمل كل حاجة، إن هو يكتشف سر الحياة، إن يطلعوا في الكون يقولك بنبحث عن مكان آخر نعيش عليه غير الأرض، حتى بدأوا يسموه "غزو الفضاء" غزو ليه؟ مش اكتشاف، خد بالك من التعبيرات، **الإنسان لما يبعد عن الاتصال بالله وبالقرآن يكون عدائياً**، غزو، غزو ليه؟ أنت بتغزو مين؟ أنت بتعادي الله قصدك؟ تغزو الفضاء؟ أنت ليه ناسي إن ليك رب؟ ليه ناسي إن ليك رب هو اللي خلق كل شيء.

يعني أنا شوفت فيلم تسجيلي علمي يشرح الكون والمجرات والمسافات والكواكب، فيلم مبهر، أنت طول ما أنت بتتفرج على الفيلم عمال تقول: سبحان الله، غصب عنك، إجبار، فتلاقي الراجل اللي عمال يشرح في آخر الفيلم بعد ساعة ونصف يقول ايه؟ "ولا نعلم من الذي أتى بهذه الأشياء، ولا نعلم ايه اللي هيحصل؟ ولا كيف أتينا؟ ولا كيف كانت البداية؟ ولا ايه اللي هيحصل" يا نهار أبيض، مش عارف! مش عارف! أنت لو سألت طفل صغير على الفطرة يقولك: ربنا، أي حد تعالى يا عم محمد مثلاً يقولك: ربنا، أي حد تسأله، وعلماء في الفلك، فطغيان الأسباب، وهنا لما نيجي نبص كذا، نبص على المعادلة دي:

"الَّذِي خَلَقَ" يبقى دي القدرة المطلقة، **"خَلَقَ الْإِنْسَانَ مِنْ عَلَقٍ"** بالنسبة للإنسان العلق ده العجز المطلق، ما هو العلقه دي يا جماعة ده شيء كذا حته لحم متعلقة في جدار الرحم، والسوائل والدم بينزل وهو في لحظة مُعرض إنه ينفك وينهار وينزل. شوفت مشهد كذا مشهد واحد اترمي في شلال، وشلال جارف والشلال عمال يخطب يمين وشمال وبعدين لقي حته شجرة طالعة قام ماسك فيها، وفي لحظة الشجرة عمالة تبدأ تفك وحظه بقى جه أي حاجة بدأت تأكل في الشجرة، عارفين أنتو المشاهد الدراما دي والإثارة دي، وعمال يتفرج على الشجرة وهي بتنفك، هو ده الإنسان! متعلق، علقه في كل حاجة، يعني في كل خطوة من خطوات حياته هو كذا، بس هو أحياناً غطاء الأسباب بيعميه، فالعلق: ده العجز المطلق، فالإنسان عاجز.

طغيان الإنسان العاجز الضعيف عند استغناؤه عن الله القدير الكريم:

"الَّذِي خَلَقَ * خَلَقَ الْإِنْسَانَ مِنْ عَلَقٍ * اقْرَأْ وَرَبُّكَ الْأَكْرَمُ" ربنا كريم، **"الَّذِي عَلَّمَ بِالْقَلَمِ"** الإنسان جاهل، طب عندنا معادلة: الإنسان عاجز، الإنسان جاهل، الله قدير، الله كريم، كان المتوقع الإنسان يطيع ربه، تُفاجأ إن الآية رقم ٦ بعد المقدمات الخمسة دي **"كَأَلَّا إِنَّ الْإِنْسَانَ لَبَطْغَى"**، ده الإنسان دا! مش ممكن ايه دا، ايه الدنو ده في المعاملة! ايه دا، عاجز جاهل!

"خَلَقَ الْإِنْسَانَ مِنْ نُطْفَةٍ فَإِذَا هُوَ خَصِيمٌ مُبِينٌ" النحل: ٤، إذا دي بيسموها في اللغة "إذا الفجائية"، **"مِنْ نُطْفَةٍ فَإِذَا هُوَ"**، عارف ابنك مثلاً أنت معمملتلوش حاجة **"أَنْتُمْ تَخْلُقُونَهُ"** الواقعة: ٥٩، ابنك بقى أنت عمال جيت له البامبرز ورضعته وتصرف عليه وتوديه حضانه وتدخله ابتدائي ويحي عايز شنطة وعايز جزمة وعايز مش عارف ايه وتقعده وتطلع، فلما اشتد ساعده رمان، تخيل أول لما بيدأ يكبر بيدأ يطغى عليك، ومايعبركش ويقسو عليك، ايه دا! تبقى أنت عايز تقول على الشخصية دي ايه! فتخيل لما الإنسان يعمل كذا مع ربه، دي البداية معقول!

"بَرَاقَ النَّبِيِّ - صَلَّى اللَّهُ عَلَيْهِ وَسَلَّمَ - فِي كَفِّهِ، ثُمَّ وَضَعَ أَصْبَعَهُ السَّبَّابَةَ وَقَالَ: يَقُولُ اللَّهُ -عَزَّ وَجَلَّ-: أَتَى تُعْجِزُنِي ابْنَ آدَمَ وَقَدْ خَلَقْتُكَ مِنْ مِثْلِ هَذِهِ"^٧ أنسيت؟ معاك ايه؟ ايه اللي أعماك؟

عشان كذا "كَأَنَّ الْإِنْسَانَ لَيْطَعِي" شوف التأكيد الإنسان ٣ مرات: "خَلَقَ الْإِنْسَانَ مِنْ عَلَقٍ" يبقى الإنسان من علقه، "عَلَّمَ الْإِنْسَانَ" يبقى الإنسان جاهل، كان المتوقع الإنسان يطيع "كَأَنَّ الْإِنْسَانَ لَيْطَعِي" ايه دا؟ ايه المفارقة الرهيبة بين المقدمات والنتائج؟ ايه المفارقة الرهيبة دي! نسي أنه خلق من عدم، نسي أن ربه أكرمه، نسي حينما كان نطفة، كان لا يستطيع أن يدفع عن نفسه أي شيء حتى الهواء، ميعرفش يعمل حاجة لنفسه، فالضغط على الفطر بصفة الخالقية تخلي الفطرة اللي فيها بقايا فطرة سليمة تستجيب. فالبداية في القرآن بدأت بالخلق عشان كذا.

وأيضًا الخلق يخليك مع ربنا مش خايف من حاجة، الخلق بيديك يقين في قدرة الله، الخلق بالذات يعني الرحيم واللطيف والرؤوف كل دي صفات بترحمك، أو فيه لطف، أو فيه حاجات مخلوقة، ربنا بيرحمك بحاجة معينة بسبب معين، الخلق هو الإيجاد من عدم، حاجة مش موجودة وربنا جابها، لا يستطيعها إلا الله؛ عشان كذا لما سيدنا زكريا قال: "أَتَى" مريم: ٨، قال: "وَقَدْ خَلَقْتُكَ مِنْ قَبْلُ" مريم: ٩، فكره بالخلق، كلمه عن صفة الخلق، لما تعجب زكريا ازاي يجميله ولد وامراته عاقر وبلغ من الكبر عتياً، قال: "وَقَدْ خَلَقْتُكَ مِنْ قَبْلُ وَلَمْ تَكُ شَيْئًا" فالتذكير بصفة الخلق.

صاحب الجنين شاف الجنات والأنهار والنخيل والعنب والأشجار "قَالَ مَا أَظُنُّ أَنْ تَبِيدَ هَذِهِ أَبَدًا" الكهف: ٣٥، معايا أسباب، الأسباب دي لا يمكن تروح أبداً! قال: "أَكْفَرْتُ بِالَّذِي خَلَقَكَ" الكهف: ٣٧، أنت نسيت أصلك؟ أنت جاي منين؟ الحاجات دي جت منين؟ أين خالقها؟ أين مبتدئ خلقها ونشأتها، فين؟

وبعدين شوف الجمال "اقْرَأْ بِاسْمِ رَبِّكَ الَّذِي خَلَقَ" خلق هنا قالوا: المفعول محذوف يعني خلق كل حاجة، وبعدين "خَلَقَ الْإِنْسَانَ"، طب ما كان ربنا قال "الَّذِي خَلَقَ" والإنسان من ضمن اللي ربنا خلقه؟ ليه التركيز على الإنسان؟ كأن فيه عناية خاصة بخلق الإنسان، وكأن اللي خد العناية الخاصة هو اللي طغى!

يعني كان من المتوقع ربنا خلق كل حاجة، وخلق الإنسان بعناية خاصة "تَسْجُدْ لِمَا خَلَقْتَ بِإِيدِي" ص: ٧٥، حاجة خاصة، نفخ فيه من روحه -سبحانه وتعالى-، العناية الخاصة دي كانت تستوجب مزيد شكر، إنما الكون كله يقول: "أَتَيْنَا طَائِعِينَ" فصلت: ١١ والإنسان اللي خد العناية الخاصة يطغى! ايه المفارقات العجيبة دي!

"خَلَقَ الْإِنْسَانَ" كمال العناية، "مِنْ عَلَقٍ" أصله، و"خَلَقَ الْإِنْسَانَ" يعني كل الناس، فلما تيجي تبص على الوزير والرئيس وفلان والطبيب والمهندس كلهم علق! ودي مقدمة عشان لما تيجي تتعامل مع أمثال أبي جهل اللي هيجي الوقت، أبو جهل اللي منع، هيجي معانا في الآيات، فتيجي تتعامل مع أمثاله تعرف إن أصله علقه، فتعامله على قده، تديله حجمه الحقيقي.

القرآن يبصرك بحقيقة الأشياء:

احنا قلنا القرآن بيخليك تبصر الأشياء على حقيقتها، فتدي لفلان حجمه؛ عشان كذا سيدنا موسى يقول لبني إسرائيل: أنتوا خايفين من فرعون واللي معاه؟ "عَسَىٰ رَبُّكُمْ أَنْ يُهْلِكَ عَدُوَّكُمْ وَيَسْتَخْلِفَكُمْ فِي الْأَرْضِ" الأعراف: ١٢٩ يشيله ويجيبكم مكانه، ده عند بني إسرائيل ازاي يعني؟

^٧ صحيح ابن ماجه

عاد قالوا: **"مَنْ أَشَدُّ مَنَا قُوَّةً"** فصلت: ١٥ ربنا أهلكهم بايه؟ بهوا، بشوية هوا، معرفش يقف قدام شوية هوا، فالإنسان بيطلع، أنا قرأت أثر مضحك في الطبري -من الإسرائيليات- إن سيدنا موسى وهو معاه بني إسرائيل وبيجروا فضرب البحر ففلق البحر، فدخل موسى وبني إسرائيل، أنا متوقع إن فرعون أول لما يشوف المشهد ده يقول: الله، ايه دا، ويقول بقي: آمنت، فرعون لما شاف المشهد ده التفت إلى جنوده وقال: ألا ترون البحر فُلقَ فَرَقًا مِنِّي؟ شايفين؟ طب ما هو اتفلق لموسى قبلك! كأنه من شدة خوفه من بدري من مسيرة شهر! ايه دا، ايه الغباء دا! العجيبة إن اللي معاه صدقوه ومشبوا، يعني أنا مش متخيل!

الواحد لما بيقرا في سورة الزخرف فرعون بيقول ايه في الآيات: **"أَلَيْسَ لِي مَلِكٌ مِصْرَ وَهَذِهِ الْأُمَمُ تَجْرِي مِن تَحْتِي"** الزخرف: ٥١، هو دلوقتي لما بيقولوا إن موسى نبي فيقولهم -شوف بقى الخطاب العقلي اللي بيقتنعهم فرعون- بيقولهم: **"فَلَوْلَا أُلْقِيَ عَلَيْهِ أَسْوِرَةٌ مِّنْ ذَهَبٍ أَوْ جَاءَ مَعَهُ الْمَلَائِكَةُ مُقَرَّرِينَ"** الزخرف: ٥٣ هو بيعمل مقارنة، بيقولهم: **"أَمْ أَنَا خَيْرٌ مِّنْ هَذَا الَّذِي هُوَ مَهِينٌ وَلَا يَكَادُ يُبِينُ * فَلَوْلَا أُلْقِيَ عَلَيْهِ أَسْوِرَةٌ مِّنْ ذَهَبٍ أَوْ جَاءَ مَعَهُ الْمَلَائِكَةُ مُقَرَّرِينَ"** الزخرف: ٥٢: ٥٣، أنا حاسس إن ده خطاب أطفال، بيضحك على شوية عيال، بيقولهم آه لو كان معاه ذهب، العجيب إن الآية اللي بعدها إن الناس بتصفق! **"فَاسْتَخَفَّ قَوْمَهُ فَأَطَاعُوهُ"** الزخرف: ٥٤، ده صدقوه! ايه دا! صدقوا الكلام دا! يعني أنا مش متخيل، صدقوا الكلام إن أسورة ذهب تنزل! صدقوا الكلام دا! **"فَاسْتَخَفَّ قَوْمَهُ"** -استخفهم وهما كانوا خفاف العقول- **"فَأَطَاعُوهُ إِنْهُمْ كَانُوا قَوْمًا فَاسِقِينَ"**.

فالشاهد؛ **أن القرآن ببصرك**، تعرف حقيقة عاد وفرعون وأي أمثال أي جهل، حقيقتهم علق، وتعرف قدر من تعبد وإلى من تسجد، ومن أنزل عليك القرآن إنه **"الَّذِي خَلَقَ"** قدرة مطلقة، يفعل ما يشاء في الكون، عشان كدا سيدنا إبراهيم شايف النار ومش خايف، اللي خلقها يطفئها، الموضوع عنده هو خلاص رأى الأشياء على حقيقتها.

"خَلَقَ الْإِنْسَانَ مِنْ عَلَقٍ * اقْرَأْ وَرَبُّكَ الْأَكْرَمُ" يبقى أنت كنت ممتنع عن القراءة عشان حاجتين: عشان عجزك؛ عشان أنت عاجز، وعشان أنت جاهل، فرينا بيقولك: ربنا قدير وربنا كريم، فاسلك هذا الطريق، تخيل أنت ماشي في طريق ربك الذي لطالما ربك بنعمه -سبحانه وتعالى-، ربك قدير وربك كريم، لما ربنا قال لسيدنا موسى: **"اذْهَبْ إِلَىٰ فِرْعَوْنَ إِنَّهُ طَغَىٰ"** طه: ٢٤، في سورة طه، فسيدنا موسى طلب طلبات: **"رَبِّ اشْرَحْ لِي صَدْرِي * وَيَسِّرْ لِي أَمْرِي * واحْلُلْ عُقْدَةً مِّنْ لِّسَانِي * يَفْقَهُوا قَوْلِي * واجْعَلْ لِّي وَزِيرًا مِّنْ أَهْلِي * هَارُونَ أَخِي * اشْدُدْ بِهِ أَزْرِي * طه: ٣١: ٣٥** فلما طلب الطلبات دي فرينا بيقوله: **"قَدْ أُوتِيتَ سُؤْلَكَ يَا مُوسَىٰ * وَلَقَدْ مَنَّا * دي مش أول مرة * وَلَقَدْ مَنَّا عَلَيْكَ مَرَّةً أُخْرَىٰ * إِذْ أَوْحَيْنَا إِلَىٰ أُمِّكَ مَا يُوحَىٰ * أَنْ اقْدِفِيهِ فِي التَّابُوتِ فَاقْدِفِيهِ فِي الْبَيْتِ فَلْيُلْقِهِ الْبَيْتُ بِالسَّاحِلِ"** طه: ٣٦: ٣٩، يبقى الذي طالما ربك بنعمه، يعني ربنا ابتداء النعم عليك وأنت معملتش حاجة، وأنت لسه معملتش أي حاجة، أفلا يتم نعمته عليك وأنت تطيعه؟

يعني ربنا لما بيقول للنبي -صلى الله عليه وسلم-: **"أَمْ يَجِدُكَ يَتِيمًا فَآوَىٰ * وَوَجَدَكَ ضَالًّا فَهَدَىٰ * وَوَجَدَكَ عَائِلًا فَأَغْنَىٰ"** الضحى: ٦، مش دي أنت كنت لسه أنت معملتش حاجة وربنا ادهالك، فلما تعمل هيديك طبعي، فالذي ربك بنعمه من قبل أن تفعل شيئًا أفلا يتم نعمته عليك وأنت تطيعه؟!

"اقْرَأْ وَرَبُّكَ الْأَكْرَمُ" توكل أنت بس على الله وربك كريم.

"الَّذِي عَلَّمَ بِالْقَلَمِ * عَلَّمَ الْإِنْسَانَ مَا لَمْ يَعْلَمْ" بعضهم أشار إن معاملة ربنا قد تكون بأسباب، وقد تكون بغير أسباب.

"عَلَّمَ بِالْقَلَمِ * عَلَّمَ الْإِنْسَانَ مَا لَمْ يَعْلَمْ * كَلَّا إِنَّ الْإِنْسَانَ لَبَطْفَىٰ" عَلَّمَ بدون افتقار، طغيان!

هنا الآيات بتتكلم عن العلم **"عَلَّمَ الْإِنْسَانَ"** اللي هيتعلم العلم وهذا العلم لا يزيده سجودًا ويزيده اقترابًا، زي ما في آخر السورة؛ السورة بدأت بـ **"اقْرَأْ"** وختمت بـ **"وَأَسْجُدْ وَاقْتَرِبْ"**، يبقى اللي بيقرا بيسجد ويقترب، اللي بيتعلم بيزداد **"إِنَّمَا الْعِلْمُ الْحَشِيَّةُ"** زي ما قال ابن مسعود، **"إِنَّمَا يَخْشَى اللَّهَ مِنْ عِبَادِهِ الْعُلَمَاءُ"** فاطر: ٢٨، يبقى العلم الذي لا يزيده خشية يزيدك طغيان -والعياذ بالله-.

سبب وعلاج الطغيان:

"عَلَّمَ الْإِنْسَانَ مَا لَمْ يَعْلَمْ * كَلَّا إِنَّ الْإِنْسَانَ لِرَبِّهِ لَكَنَافٍ" **لِيَطْغَى** "ليه الإنسان بيطغي يا جماعة؟ ليه تشوف أفعال الإنسان إنه يطغي في علاقته بالله، ايه السبب الرئيسي؟ **"أَنْ رَأَاهُ اسْتَغْنَى"** العلق: ٧.

"رَأَاهُ" الهاء دي عائدة على مين؟ لو عايزين نشيل الهاء -الهاء ده ضمير- عايزين نشيل الهاء دي ونحط اسم مش ضمير، أيوه، رأى الإنسان نفسه يعني: شاف نفسه، بمجرد ما تبصر بس وتعتقد في قدراتك هتبدأ تطغي!

شوف مثلاً واحد مريض على السرير يا رب يا رب يا رب، أول ما رجله بس بره المستشفى، لأ ده هو لو كان نائم وبدأ يقعد يبدأ ينسى؛ ينسى الاحتياج، أول ما يحس بالاستغناء بالصحة أو الاستغناء بالمال يبدأ يطغي، **عشاوة الأسباب اللي بتخلي الناس تطغي**، المشركين في نص البحر قالوا: يا رب، المشركين أما جم في نص منتصف البحر قالوا: يا رب، لما فقد الأسباب قال: يا رب، فطبيعي إن أي حد يفقد الأسباب يقول: يا رب، إن بقي فيه ناس تدخل نص البحر ومتقولش يا رب دي مصيبة تانية، ده زي لما تيجي تسأله مين الذي خلقتك؟ يقولك معرفش، دول شواذ بالفطر أصلاً، فطبيعي إن الإنسان لما يبعد عن الأسباب بيفتقر، ربنا يقولك: **لا بد أن تنظر إلى الأسباب على أنها لا تساوي شيئاً إلا بالله**، لازم، مش معنى شوية عضلات إنك تفتري، لأ، الموضوع مش كدا، ف لازم الإنسان مايطغاش بالأسباب **"كَلَّا إِنَّ الْإِنْسَانَ لِرَبِّهِ لَكَنَافٍ"** السبب الرئيسي: **"أَنْ رَأَاهُ اسْتَغْنَى"**.

الإنسان ده بقي تذكره بايه أو هو يرجع ازاى؟ **"إِنَّ إِلَى رَبِّكَ الرُّجْعَى"** العلق: ٨، لازم يفكر إن يوم هيرجع لربنا، خد بالك **"إِنَّ إِلَى رَبِّكَ الرُّجْعَى"** دي خطاب للإنسان الطاغية، وخطاب للإنسان اللي هو بقي في الأول أهو إنسان فقير جاهل عاجز، بادئ يجاهد، وبادئ يتقرب الشبر إلى الله، فالجاهدة دي ربنا يقولك أنت هترجع لربنا، وهيعطيك ثواب كل خطوة خطتها **"وَلَا يُظْلَمُونَ نَفِيرًا"** النساء: ١٢٤، ولا قَطْمِيرًا، مفيش حاجة هتظلمها.

"إِنَّ إِلَى رَبِّكَ الرُّجْعَى" ربنا يقولك، الإنسان اللي بيطغي ده افكر إن فيه يوم هترجع لربنا، وهتسأل، هذا الإنسان الذي طغي، **علاج الطغيان: تذكر الدار الآخرة.**

أعداؤك يرقبونك:

"إِنَّ إِلَى رَبِّكَ الرُّجْعَى * أَرَأَيْتَ الَّذِي يَنْهَى * عَبْدًا إِذَا صَلَّى" العلق: ٨: ١٠، من أول سورة في القرآن وربنا بيعرفك إن الطريق ده الناس مش هتسيبك تمشي فيه، ربنا من أول سورة بيعرفك إن فيه أعداء قاعدين لك على الطريق، والأعداء دول مش مثلاً لما تيجي تدعو إلى الله هيمنعوك أو لما تيجي تطلب العلم هيمنعوك، أو لما تيجي تأمر بالمعروف وتنهي عن المنكر هيمنعوك، لا لا ده بمجرد أن تصلي هيمنعوك.

"أَرَأَيْتَ الَّذِي يَنْهَى * عَبْدًا إِذَا" ايه؟ مش عبداً صلى **"عَبْدًا إِذَا صَلَّى"** يعني بمجرد ما يبدأ يصلي هيبداوا ينهوك عن الصلاة، فيه أعداء قاعدين لك مستنيين لحظة دخولك إلى المسجد يمنعونك، قال النبي -صلى الله عليه وسلم-: **"إِنَّ الشَّيْطَانَ قَعْدَ لَابْنِ آدَمَ بِأَطْرَقِهِ -كلها-"**^٨ قاعد لك، بأطرقه ايه؟ كلها، مش قاعد لك في سبل الإصلاح، وسبل الصلاح سايبك، لأ، فيه ناس هتنتهاك حتى عن الصلاة.

"أَرَأَيْتَ الَّذِي يَنْهَى * عَبْدًا إِذَا صَلَّى" فرينا يقول للي بينه عبداً إذا صلى دا: **"أَرَأَيْتَ إِنْ كَانَ عَلَى الْهُدَى * أَوْ أَمَرَ بِالتَّقْوَى"** العلق: ١١: ١٢، مش جايز اللي أنت بتنتهاه ده يكون هو اللي صح؟ وشوف الخطاب، واحد بيعادي الإسلام، وشوف الخطاب! ربنا يقولك ايه، عارف زي في

^٨ صحيح النسائي

سورة سبأ: "وَإِنَّا أَوْ إِيَّاكُمْ لَعَلَىٰ هُدًى أَوْ فِي ضَلَالٍ مُّبِينٍ" سبأ: ٢٤، ربنا يقولهم: أنت تقولهم: واحد فينا صح وواحد فينا غلط؛ لأن مينفعش حاجة اسمها اتنين صح.

الحمد لله وحده، والصلاة والسلام على من لا نبي بعده، محمد -صلى الله عليه وسلم-؛ يبقى مرة ثانية السورة دي بتديك البداية الصح، واللي هيبدا من غير سورة العلق هيبضل، البداية: أد ايه الإنسان فقير، وأد ايه الإنسان عاجز، وأد ايه الإنسان جاهل، البداية: أد ايه ربنا قدير، أد ايه ربنا كريم، أد ايه ربنا حلیم على هذا الإنسان الذي يطغى، البداية إن الأسباب، يا جماعة دي البداية يعني ٦٢٠٠ آية وشوية و ١١٤ سورة دي البداية، بداية هذا الطريق الطويل، يعني دي أسس، يعني دي العمود اللي بيغيب منها انهيأر، يعني زي ما في أركان، وفي واجبات، وفي سنن، دي أركان، دي عواميد مينفعش تغيب عن قلوب الناس وعن أفعالها.

بداية من غير صلاة بداية لا تثمر

البداية إن فيه ناس مش هتسيبك، البداية إن الناس دي هتتهاك حتى عن الصلاة، والبداية أهمية الصلاة، اللي بدايته مفيهاش صلاة قوية سواء في الفروض أو في قيام الليل دي بداية ضعيفة، بداية لا تكمل!

"عَبْدًا إِذَا صَلَّى"، وربنا أمر النبي -صلى الله عليه وسلم- في الآخر بالسجود "لَا تُطْعَمُهُ وَاسْجُدْ"، كأنها "وَاسْجُدْ" أي: واستمر في السجود، يعني كان النبي -صلى الله عليه وسلم- يُدِم السجود، ودي البداية، فبداية من غير صلاة بداية لا تثمر، يعني إنسان لا يقرأ القرآن في القيام، يعني لا يقوم الليل بالقرآن دي بداية ضعيفة هيكمل ازاى؟ مفيش بداية أصلاً مشرفة ولا محرفة، ولا أي بداية!

"أَرَأَيْتَ الَّذِي يَنْهَى * عَبْدًا إِذَا صَلَّى"، فترجع بقى للخطاب ربنا يقول -للي بينهاه يعني-: "أَرَأَيْتَ إِنْ كَانَ عَلَى الْهُدَى" اللي أنت بتنهاه، مقالوش: بل هو على الهدى، وهو حتمًا على الهدى -صلى الله عليه وسلم-، شوف الخطاب، طب فكَر، طب مش جازي هو صح؟ زي ما مؤمن آل فرعون قالهم: طب فيه احتمالين:

"وَإِنْ يَكُ صَادِقًا يُصِيبُكُمْ بَعْضُ الَّذِي يَعِدُكُمْ" يعني "وَإِنْ يَكُ كَاذِبًا فَعَلَيْهِ كَذِبُهُ" غافر: ٢٨، بس فيه احتمال، والاحتمال الثاني عواقبه مش سهلة، ففيه احتمال، فرينا يقول له: "أَرَأَيْتَ إِنْ كَانَ عَلَى الْهُدَى * أَوْ أَمَرَ بِالْتَّقْوَى".

وفيه قول مش معناه إنه كنفاش عقلاي، ده معناه "أَرَأَيْتَ إِنْ كَانَ عَلَى الْهُدَى" أفتنهاه لأجل أن يصلي ولأجل أن يأمر بالتقوى؟ لأجل هذا تنهاه؟ أي عقل تحتويه! وأي تفكير تفكر! يعني عشان بيصلي تقوم تنهاه! يعني "أَخْرِجُوا آلَ لُوطٍ مِّنْ قَرْيَتِكُمْ" ليه؟ "إِنَّهُمْ أَنَاسٌ يَنْتَهَرُونَ" النمل: ٥٦، لأجل أنهم يتطهرون! لأجل أنهم يصلون!

يعني فلان متشدد، ليه؟ أصله بيتكلم عن الدار الآخرة، مجد والله؟! فلان متشدد، ليه؟ أصل بيقول حرام وحلال، أmaal نخليه الحلال والحلال؟ فلان متشدد، ليه؟ أصل بيقول كلمة كافر، طب ما القرآن مليان كلمة كافر، أmaal كله واحد يعني ولا ايه، فتجد أنت بتنهاه ليه؟ عشان بيصلي!

المشركين في مكة فَرَعُوا! فَرَعُوا من صلاة أبي بكر في ساحة الدار، كان يصلي صوته يبلغ الناس، وكان رجل أسيف فكان النساء والصبيان ييجوا عشان يسمعوا صلاة أبي بكر، فخافوا من صلاته، شوف خافوا، الناس مش خايفة من دعوتنا، هم كان زمان صلاتهم تغير، مجرد صلاته، عشان كذا لما قوم شعيب حسوا إن هو اتغير، فقعدوا يدوروا ايه الحاجة اللي غيرته لقوها الصلاة، فقالوا: "أَصَلَاتُكَ تَأْمُرُكَ" كأن مفيش حاجة اتغيرت فيه غير الصلاة، والصلاة دي الحرك الأساسي اللي بيأمره وبينهاه، لقوا إن الصلاة بتغير فيه فعلاً، الصلاة بتأمر بالمعروف، وتنهاك عن المنكر، فقالوا: "أَصَلَاتُكَ تَأْمُرُكَ" -كان الصلاة اللي بتأمره- أَنْ نَتَزَكَّ مَا يَعْبُدُ آبَاؤُنَا أَوْ أَنْ نَفْعَلَ فِي أَمْوَالِنَا مَا نَشَاءُ -

ايه اللي حصلك؟ ايه الحاجة اللي غيرتك دي؟ ليه الصلاة غيرتك كدا؟ - **إِنَّكَ لَأَنْتَ الْحَلِيمُ الرَّشِيدُ** هود: ٨٧، إما قيل: أي لكنت أنت الحليم الرشيد هو ايه اللي غيرك؟ أو استهزاء: **"إِنَّكَ لَأَنْتَ الْحَلِيمُ الرَّشِيدُ"**، فالشاهد كانوا يهونهم عن الصلاة؛ كانت الصلاة بتغير ليس فقط في أنفسهم ولكن في غيرهم، تخيل لما مشهد الصلاة يغير الناس.

"أَرَأَيْتَ الَّذِي يَنْهَى * عَبْدًا إِذَا صَلَّى * أَرَأَيْتَ إِنْ كَانَ عَلَى الْهُدَى * أَوْ أَمَرَ بِالْتَّقْوَى * أَرَأَيْتَ إِنْ كَذَّبَ وَتَوَلَّى" العلق: ٩: ١٣.

طب اللي بينها ده بقى طب هو بيعمل ايه؟ طب أنت شايف إنه وحش عشان يبصلي، طيب هو وحش أنت بقى بتعمل ايه؟ عارف لما يجي مثلاً مديعة قمة التبرج وبعدين بتستضيف واحد إسلامي وهي الحلقة كلها إن هو وحش، وإن هو متشدد وجاهل ومخرب وهيدمر الاقتصاد طيب ماشي هو وحش، أنا وحش، ايه الطرح بقى اللي عندك؟ يعني ايه البديل؟ أنا وحش، يعني زي سيدنا شعيب يقولهم: **"لَا يَجْرِمَنَّكُمْ شِقَاقِي أَنْ يُصِيبَكُمْ مِثْلُ مَا أَصَابَ قَوْمُ نُوحٍ"** هود: ٨٩ يعني مش معنى إنك تكرهني إنك تحش النار! يعني دلوقتي أنا وحش تقوم ترمي نفسك في جهنم! يا سيدي اعبد الله أنت، طبق أنت الإسلام، فأنت دلوقتي أنت بتكرهني، طب اطرح أنت بقى الطرح، أنت بتقول مش هو ده الإسلام، خلاص، قول بقى، آمال الإسلام إن احنا نقلع يعني؟ طب أنا وحش ايه الطرح البديل؟ فرينا بيقوله: **"أَرَأَيْتَ إِنْ كَذَّبَ وَتَوَلَّى"** طب هو عمل ايه غير إن هو كذب وتولى، يعني هو ده البديل؟ يعني أنت بتنهاه وشايف إن هو ده البديل؟

"أَلَمْ يَعْلَم بِأَنَّ اللَّهَ يَرَى" العلق: ١٤، يبقى السورة دي حتى الآن فيها نوعين من التهديد:

الأول: **"إِنَّ إِلَى رَبِّكَ الرُّجْعَى"**؛ ده يوم القيامة.

وطوال هذه الفترة **"أَلَمْ يَعْلَم بِأَنَّ اللَّهَ يَرَى"**؛ الشعار ده يا جماعة ده مش بس حتى نخاطب به الأعداء، أنت لو شعارك قبل أي فعل بتفعله: **"أَلَمْ يَعْلَم بِأَنَّ اللَّهَ يَرَى"**. الشعور ده يدفع اللي بيعادي الإسلام أنه يخشى الله؛ يخوفه من ربنا، إن ربنا شايفك، وربنا هيحاسبك على كل كلمة بتفعله، وزاد للإنسان في الطريق إلى الله عشان يخلص كلامه وأفعاله إلى الله - عز وجل -، تخيل شعارك في حياتك: **"أَلَمْ يَعْلَم بِأَنَّ اللَّهَ يَرَى"** أنت مش عارف إن ربنا شايفك؟

"كَأَلَّا لَنْ لَمْ يَنْتَه لَسَفْعًا بِالنَّاصِيَةِ" العلق: ١٥، **"إِنَّ اللَّهَ يُدَافِعُ عَنِ الَّذِينَ آمَنُوا"** الحج: ٣٨، أبو جهل قال: **"إِنِّي لَأَكْثَرُ هَذَا الْوَادِي نَادِيًا"**، محدش يعرف يعمل حاجة، النبي - صلى الله عليه وسلم - لما نهره وأغلظ له القول عند الكعبة، فقال: ألم تعلم بأي أكثر هذا الوادي نادياً؟ لن رأيت محمداً يعفر وجهه بين أظهركم لأطأن عنقه، **"إِنَّ اللَّهَ يُدَافِعُ عَنِ الَّذِينَ آمَنُوا"**.

"كَأَلَّا لَنْ لَمْ يَنْتَه لَسَفْعًا بِالنَّاصِيَةِ" دفع بقوة ويؤخذ بناصيته ويُلقي في جهنم - والعياذ بالله -.

"لَسَفْعًا بِالنَّاصِيَةِ * نَاصِيَةٍ كَازِبَةٍ خَاطِئَةٍ * فَلْيَدْعُ نَادِيَهُ * سَنَدْعُ الزَّبَانِيَةَ" العلق: ١٥: ١٨، تنزل في الخطاب كأنه إذا كان عندك من الناس فإن هناك زبانية ينتظرونك، يدفعونك إلى جهنم دفعاً - والعياذ بالله -، وأنت لا تستطيع أن تدفع عن نفسك ولا النادي الذي معك يستطيع أن يدفع عنك.

"سَنَدْعُ الزَّبَانِيَةَ" الزبانية أصلاً من الزبن أي من الدفع بقوة.

"سَنَدْعُ الزَّبَانِيَةَ * كَلَّا لَا تَطَعُهُ وَأَسْجُدْ وَاقْتَرِبْ" العلق: ١٨: ١٩، يبقى ربنا في ختام السورة خاطب خطابين؛ خطاب للذي هُي، خطاب لأي جهل وخطاب للنبي - صلى الله عليه وسلم -، خطاب لمن سار على درب أبي جهل، وخطاب لمن سار على درب النبي - صلى الله عليه وسلم -.

خطاب لمن سار على درب أبي جهل: اعلم أن الله يراك، وأن الله سيعاقبك، ولئن استمرت على ما أنت عليه سوف ينزل بك عقاب الله مهما كان معك من قوة ومن أسباب، قضية الأسباب في السورة واضحة جداً، الاستغناء بالأسباب وإن استغنى بما معه من أقوام كأبو جهل.

خطاب للنبي -صلى الله عليه وسلم- ولمن سار على دربه: **"لَا تُطِغْهُ وَاسْجُدْ"**.

الجمال في ختام السورة إن أبو جهل قال للنبي -صلى الله عليه وسلم-: ماتسجدش، مقالوش حتى متصلش، قال: لئن رأيت محمدًا يعفر وجهه؛ يعني السجود فجه الأمر بنفس الشيء اللي هناك عنه إنك تعمله؛ ده الأول.

يعني هو مثلاً ماتتكلمش في الولاء والبراء مثلاً، تقوم أنت تتكلم في إيه؟ مش في العقيدة في الولاء والبراء ركز؛ لأن هو لما بينهاك عن شيء هو عارف خطورته، تقوم أنت تعمل دا، هو لما بينهاك، لما يقولك مثلاً متتكلمش مثلاً عن أحكام الإسلام في التعامل مع غير المسلمين، تقوم أنت تتكلم في أحكام الإسلام في التعامل مع غير المسلمين؛ هو لما بينهاك عن شيء هو مش بينهاك اعتباطاً ده هو عارف خطورة اللي بينهاك عنه، وعارف تأثير اللي بينهاك عنه، تقوم أنت تعرف إيه، يعني أحياناً أنت مبتقاش واخذ بالك من قيمة حاجة إلا لما يقولك متعملهاش، انت مش واخذ بالك من قيمتها أصلاً، فهو بيفيدنا، يعني هو لما يقولك متعملش حاجة أنت بتستفاد، بتعرف قيمة الحاجة دي بقي، بتعرف قيمتها، ولما ربنا قاله: **"وَاسْجُدْ"** عرّفوا قيمتها، قاله: **"وَاسْجُدْ وَاقْتَرِبْ"** يبقى أحياناً أنت مبتقاش عارف قيمة اللي أعداء اللي بينهوك عنه؛ لأن هو جرب تأثير ده في نفسه وفي غيره، هو عرف، يعني لما يقولوا: **"لَا تَسْمَعُوا لَهُذَا الْقُرْآنَ وَالْعَوَّا فِيهِ"** فصلت: ٢٦ هم عارفين تأثير القرآن، لما يقولوا له: **"أَنْتَ بِقُرْآنٍ غَيْرِ هَذَا"** يونس: ١٥، هم عارفين تأثير هذا القرآن؛ هو جربوا في نفسه وفي غيره، هو جربوا، فأنت عارف قيمة دا، فدا يجعلك تزداد تمسكاً بما هناك عنه؛ دي النقطة الأولى.

النقطة الثانية: إن مش مثلاً **"كَأَلَّا لَا تُطِغْهُ"** وجهاده وحاربه وخلص ولا تنشغل به، وبعدين مش بس **"وَاسْجُدْ"** ده **"وَاسْجُدْ وَاقْتَرِبْ"** دا ده معاني إيمانية عالية، يعني كأن انشغالك بعلاقتك بالله، وبالوصول إلى الله، وبالقرب من الله، شغلتك عن أي شيء آخر حتى لو كان تهديد بالقتل، أنت متخيل قصدي إيه؟ يعني شعورك إنك نفسك إنك توصل لربنا، وأخيراً لقيت الطاعة اللي هتوصلك لربنا، فأول لما تلاقي طاعة هتوصلك لربنا تقوم ماسك فيها حتى لو كانت هذه الطاعة تحاط بمخاطر منها القتل. إحساسك وانشغالك بنفسك إنك توصل لربنا، شغلك عن أي شيء آخر، يعني مثلاً: قطر مثلاً هيوديك اسكندرية وأنت لازم تروح اسكندرية، فقالولك القطر ده عليه فُطاع طرُق، وناس هتطلع، أنت بتسأل يعني الطريق ده هيوصلني؟ يقولك بس ده فيه ناس، يعني القطر ده بيوصل؟ بس خد بالك أنت لو ركبت هما يقولولك فيه ناس بتموت وأنت تقولهم يعني الطريق ده بيوصل؟ يعني الطريق ده بيقرّب؟ يقولولك بس الطريق ده فيه مخاطر، تقولهم الطريق ده بيقرّب؟ أنت انشغالك بقربك وبتحصيل أسباب القرب من الله شغلتك عن أي شيء آخر حتى لو كان تهديد بالقتل، أنت مشغول.

"وَاسْجُدْ وَاقْتَرِبْ" ربنا دلّك على وسيلة القرب منه -سبحانه وتعالى- أفتنشغل عنها لأمر علقه؟ أبعد أن دلني الله -عز وجل- على أمر يقربني منه -سبحانه وتعالى- أنشغل عن هذا الأمر، وعن قربي من ربي الذي خلقي وأكرمني؟ زي ما في أول السورة، أنشغل عنه لأمر شخص كائن من كان؟

والجمال زي ما كان د. حازم جزاه الله خيرًا كان بيعلمنا يعني، يقولك الجمال في شكل السجود بالذات، إن السجود ده وأنت ساجد دي الحالة الوحيدة اللي أنت ما أنتاش شايف فيها اللي اللي حواليك، يعني أنت صلي وأنت واقف لو جه واحد يضربك ممكن تتحرك بسرعة، وأنت راکع ممكن تتحرك، وأنت جالس وشايف ممكن تتحرك، إنما وأنت ساجد ده أنت قمة الاستغراق في الصلاة خلاص أنت مش شايف، يعني هو هيجي يموتني وأنا ربنا بيقولي: استمر على السجود، وكذلك فعل النبي -صلى الله عليه وسلم-، وثبت النبي -صلى الله عليه وسلم- ساجداً، في حديث البخاري: يَضَعُوا عَلَيْهِ سَلاَ الْجُزُورَ وَثَبَتَ النَّبِيُّ -صلى الله عليه وسلم- ساجداً.

سرعة الاستجابة تأتي بالانشغال بالمعاني الإيمانية:

من جمال أيضًا الأمر في **"كَلَّا لَا تُطِعْهُ وَاسْجُدْ وَاقْتَرِبْ"** إن السورة مبدأتش بـ **"لَا تُطِعْهُ وَاسْجُدْ وَاقْتَرِبْ"** لأ، ودا الكلام عن تقييح المعاني الإيمانية بداخلك، بتديك الطاقة إنك تفعل هذه الأفعال، يعني الكلام **"اقرأ"** تتعلم وتقرأ القرآن، وتفهم وتقرأ عن صفات الله، وتعرف أد ايه ربنا قدير، أد ايه ربنا كريم، وتعرف أد ايه الإنسان علقه، وأد ايه الإنسان جاهل، وأد ايه الإنسان عاجز، بعد كل هذه المقدمات لما ربنا يقولك: **"لَا تُطِعْهُ وَاسْجُدْ وَاقْتَرِبْ"** تستطيع أن تطبق هذا الأمر بسلاسة.

زي ما أمنا عائشة قالت: **"أَوَّلَ مَا نَزَلَ -من القرآن- منه سُورَةُ مِنَ الْمُفَصَّلِ، فِيهَا ذِكْرُ الْجَنَّةِ وَالنَّارِ وَلَوْ -كان- نَزَلَ أَوَّلَ شَيْءٍ: لَا تَشْرَبُوا الْخَمْرَ، لَقَالُوا: لَا نَدْعُ الْخَمْرَ أَبَدًا، وَلَوْ نَزَلَ: لَا تَزْنُوا، لَقَالُوا: لَا نَدْعُ الزَّنا أَبَدًا"**^{١٠}

فالبداية قبل **"لا تطعه"**: إنك لازم تعيش في معاني القرآن **عشان تطبق هذه الأفعال**، الأفعال دي مش زرار بتعمله جواك، لأ، الموضوع مش كدا، الموضوع لابد إنك تتعرض لـ **"اقرأ"**، لمعاني القرآن، وإنك تعامل ربنا -سبحانه وتعالى-، وتبدأ تصلي **"عَبْدًا إِذَا صَلَّى"**، وتبدأ تقف في وجه الأعداء شبرًا بشبر وذراعًا بذراع، وتبدأ واحدة بواحدة، هذه المجاهدة وهذه المعاني بتخلي جواك القلب قابل لكلمة **"لَا تُطِعْهُ وَاسْجُدْ وَاقْتَرِبْ"**، فلما تنزل **"لَا تُطِعْهُ وَاسْجُدْ وَاقْتَرِبْ"** تقوم أنت تعمل ايه على طول؟ عشان كدا آية السجود، تقوم ساجد مباشرة، خلاص أنت الآيات اللي قبلها كأنها سفلت قلبك لقبول هذا الأمر، فلما يجي يقولك **"لَا تُطِعْهُ وَاسْجُدْ وَاقْتَرِبْ"** معدش جواك أسئلة، معدش جواك طب ازاى؟ طب ما هو ممكن يضربني، طب ما هو ممكن يموتني، طب أصل المصالح والمفاسد، معدش الأسئلة دي جواك خلاص، الآيات اللي في السورة خلاص وطأت **"أَشَدُّ وَطْأً"** المزمل: ٦، وطأت داست على كل الأفكار السيئة والموسوسة اللي في قلبك، نسفتها نسفًا، تنزل هذه الآية تجد قلب يستقبلها، فتنزل بعد هذه السورة **"لَا تُطِعْهُ وَاسْجُدْ وَاقْتَرِبْ"** تقوم تسجد وتقترِب فعلاً، وتزداد قربًا من الله -عز وجل- بالسجود بعد هذه المقدمات.

ودي خطورة إن الإنسان على طول يبقى منشغل بمعاني القرآن فيبقى قلبه سريع الاستجابة، الإنسان المنشغل على طول بمعاني القرآن وبيحاول يجاهد نفسه على تطبيقها ويحاول يتخلق بأخلاق القرآن كما كان النبي -صلى الله عليه وسلم- خلقه القرآن، اللي بيحاول يفعل ذلك تجد قلبه وعقله وجوارحه سلس في الاستجابة لأمر الله -عز وجل-؛ لأن قلبه ممهد مفيهوش مطبات، مش مليان مطبات، لأ، قلب سهل لِيّن في التعامل مع الله -عز وجل-، سُمح في قبول الأوامر والنواهي.

فدي كانت وقفات سريعة مع سورة العلق، أسأل الله -عز وجل- أن ينفعنا بها، ونسأله -سبحانه وتعالى- أن يمن علينا بفهم كتابه -سبحانه وتعالى- وبالعامل بما فيه، وألا يجرمننا من تدبر كتابه -سبحانه وتعالى- ومن العمل بما فيه.

فزي ما قولنا، في الختام سورة العلق دي البداية الصحيحة، النظرة الصحيحة، العمل الصحيح، تبدأ بمعرفة قدر الإنسان والربوبية والخلق وقدرة الله المعجزة، أد ايه الأسباب بتحجب الإنسان عن صفات ربنا -سبحانه وتعالى-، هذا الطريق فيه من سيمنعك حتى عن الصلاة، مش بس الدعوة، هذا الطريق لابد فيه من جهاد، هذا الطريق لابد فيه من ثبات، هذا الطريق لابد فيه من سجود واقتراب، هذا الطريق لابد أن تُعرض فيه وألا تطيع من يحاول أن يبعدك عن الله -عز وجل- ولو بسجدة، تبتعد عنه ولا تطعه، نسأل الله -عز وجل- أن يثبتنا وأن يستعملنا في طاعته، أقول قولي هذا وأستغفر الله لي ولكم، سبحانك اللهم وبحمدك أشهد أن لا إله إلا أنت أستغفرك وأتوب إليك.